

В СУББОТУ 5-Й СЕДМИЦЫ ПО ПАСХЕ

В ПЯТОК ВЕЧЕРА,

На Господи воззвах: поставим стихов 6, и поем стихиры самаряныни три, и Минеи три.

Стихиры самаряныни, глас 1-й:

На источник пришел еси, источниче чудес, в шестый час, Евин уловити плод: Ева бо в той изыде из рая, прелестию змиевою. Приблужи бо ся самаряныня почерпсти воду, юже виде в рече Спас: даждь Ми воду пити, и аз воды текуция насыщу тя. И во град текши целомудренная, народом возвести абие: приидите видите Христа Господа, Спаса душ наших.

Глас 2-й:

На студенец яко прииде Господь, самаряныня моляше Благоутробнаго: подаждь ми воду веры, и прииму купельныя воды, радование и избавление. Животодавче Господи, слава Тебе.

Собезначальный и соприисносущный Сын и Слово Отчее, на источник прииде, источник исцелений, и жена от Самарии прииде почерпсти воду, юже виде в рече Спас: даждь Ми воду пити, и шедши пригласи твоего мужа. Она же яко Человеку глаголющи, а не Богу, утаити тщашеся, глаголаше: не имам мужа. И Учитель к ней: истину рекла еси, не имам мужа: пять бо имела еси, и ныне егоже имаши, несть твой муж. Она же о глаголе удивившись, и во град текши, народом вопияше, глаголющи: приидите видите Христа, Иже дарует миру велию милость.

Слава: глас 6-й:

При студенце Иаковли обрет Иисус самаряныню, просит воду от нея, облаками покрываяй землю. О чудесе! Иже херувимы носимый, блуднице жене беседоваше, воды прося, Иже на водах землю повесивый, воды иский, Иже источники и езера вод изливаяй, хотя привлеци сию воистинну, уловляему от сопостата врага, и напоити ю водою живою, палимую в безместных лютых, яко един Благоутробный и Человеколюбец.

И ныне: Богородичен, глас 4-й:

Иже Тебе ради, богоотец пророк Давид, песенно о Тебе провозгласи, величия Тебе сотворшему: предста Царица одесную Тебе. Тя бо Матерь ходатаицу живота показа, без Отца из Тебе вочеловечитися благоволивый Бог: да Свой паки обновит образ, истлевший страстьми, и заблуждающее горохищное обрет овча, на ramo восприим, ко Отцу принесет, и Своему хотению, с небесными совоюкупит силами, и спасет Богородице мир, Христос имеяй велию и богатую милость.

На стиховне стихиры воскресны Осмогласника, глас 4-й:

Животворящему Твоему Кресту, непрестанно кланяющемся Христе Боже, тридневное Воскресение Твое славим: тем бо обновил еси истлевшее человеческое естество Всесильне, и иже на небеса восход обновил еси нам, яко един Благ и Человеколюбец.

Стих: Господь воцарися, в лепоту облечеся.

Древа преслушания запрещение разрешил еси Спасе, на Древе крестнем волею

пригвоздився, и во ад сошед Сильне, смертныя узы яко Бог растерзал еси. Темже кланяемся еже из мертвых Твоему Воскресению, радостию вопиюще: всесильне Господи, слава Тебе.

Стих: Ибо утверди вселенную, яже не подвижится.

Врата адова сокрушил еси Господи, и Твоею смертию смертное царство разрушил еси: род же человеческий от истления свободил еси, живот и нетление миру даровав, и велию милость.

Стих: Дому Твоему подобает святыня Господи, в долготу дний.

Господи, возшед на Крест, прадедною нашу клятву потреби еси, и сошед во ад, вечныя узники свободил еси, нетление даруя человеческому роду: сего ради поюще славим животворящее и спасительное Твое востание.

Слава, и ныне: глас 8-й:

Егда явился еси во плоти Христе Боже, за неизреченное смотрение, слышавши самаряныня слово Тебе Человеколюбца, остави почерпало у студенца, и тече глаголющи сущим во граде: приидите видите Сердцеведца, еда Сей есть чаемый Христос, имеяй велию милость?

Таже, Ныне отпускаеши: **По Отче наш:**

Отпустительный тропарь, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергши, апостолом хвалящаяся, глаголаху: исповержеся смерть, воскрес Христос Бог, даруяй мірови велию милость.

[**Слава: святого, аще имать. И ныне: Богородичен во глас тропаря святого. Аще ли ни: Слава, и ныне, Богородичен, глас 4-й**]

И отпуст.

В СУББОТУ 5-Й СЕДМИЦЫ ПО ПАСХЕ

В СУББОТУ НА УТРЕНИ,

На **Б**ог Господь: тропарь воскресен, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергши, апостолом хвалящаяся, глаголаху: исповержеся смерть, воскресе Христос Бог, даруяй миру велию милость. [Дважды]

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне; Богородичен, глас 4-й]

По 1-м стихословии седален воскресен, глас 4:

Воззревша на гробный вход, и пламене ангельскаго не терпяща мироносицы, с трепетом дивляхуся, глаголюща: еда украдеса отверзый разбойнику рай? еда ли воста, Иже и прежде страсти проповедавый востание? Воистинну воскресе Христос, сущим во аде подая живот, и воскресение

Стих: Воскресни Господи Боже мой, да вознесется рука Твоя не забуди убогих Твоих до конца.

Воззревша на гробный вход ...,

Слава, и ныне, Богородичен:

Еже от века утаенное, и ангелом несведомое таинство: Тобою Богородице сущим на земли явился Бог, в неслитном соединении воплощаемъ, и Крест волею нас ради восприим, имже воскресив первозданнаго, спасе от смерти души наша.

По 2-м стихословии седален, глас 4-й:

Подобен: Вознесыйся на Крест:

Да радуется небо, да веселятся земная, яко Христос от Девы явився яко Человек, избави из истления все человечество Своею смертию, чудеса возсия: жене самаряныне воды просящей, подает источник исцелений, яко един Безсмертный.

Слава, и ныне, тойже:

Воскресение Христово: псалом 50.

Канон праздника, на 6: И святого обители, на 4: И Миней на 4. Кондак, и ексапостиларий праздника.

Песнь 1.

Ирмос: Поразивый Египта, и фараона мучителя погрузивый в мори, люди спасл еси из работы Моисейски поющыя песнь победную: яко прославися.

Погребенный воста, Собою воздвиже род человеческий: да радуется тварь вся, и мышлении днесь облацы да кропят правду яве.

Крест вольный плотию приим, тридневен воскресл еси от мертвых, адова сокровища Живоначальниче Господи истощив, и извед окованныя души.

Зраком блистающая мироносицы видевшие ангела, страхом бежаша от гроба: Христово же Востание уведевше, и возвестити тщатся учеником.

Покрываяй водами превыспренняя Господи, Вода жизни Сый, самаряныне, просящей Твоея честныя воды, подал еси разумевшей благоутробие Твое.

Троицен: **О** Троице, верою Тя чистою славящих, Отче, Сыне и Душе, яко Творец всех спасай, и очищение даруй нам грехов, яко Преблагий.

Богородичен: **Р**адуйся, Престоле огненный. Радуйся, Свещниче всезлатый. Радуйся, света Облаче. Радуйся, Палато Слова, и умная Трапезо, Хлеб жизни достойно Христа носившая.

И святого обители, на 4: И Миней на 4.

Катавасия: **Воскресения день ...,**

Песнь 3.

Ирмос: **У**твердися сердце мое в Господе, дающем молитву молящемуся, яко лук сильных изнеможе, и немощствующии препоясашеся силою.

Волею на древо вознеслся еси Слове, и зрящее распадохуся камене, и тварь преклоняшеся вся, и мертвии из гробов, якоже от сна востаху.

С душою Тя пришедша ко аду, Слове, видевши вся души праведных, от вечных уз отрешахуся, песнословяще яже паче ума силу Твою.

Что чудитесь? Что во гробе вы ищете с мвром жены, Владыку? Воста, и мир совоздвиже, ангел блистайся мвроносицам вещаше.

Жизнь сый Господи, и Источник безсмертия, сел еси при источнице Щедре, и Твоих премудрых вод исполнил еси самаряныню просящую, и поющую Тя.

Троицен: **Е**дин над всеми в Троице Бог поется, Отец и Сын и Божественный Дух, Егоже страхом славят Небеснии чинове, ясно вопиюще: Свят, Свят, Свят еси Господи.

Богородичен: **Н**есказанно заченши во утробе Твоей всех Бога, Дево Мати, паче мысли и слова родила еси, пребывши Дева яко прежде Рождества, Богоневесто.

И святого обители, на 4: И Миней на 4.

Катавасия: **Приидите, пиво пием новое ...,**

Кондак и седален святого.

Слава, и ныне: глас 4-й:

Подобен: **Вознесыйся:**

Да радуется небо, да ликовствует земная, яко Христос от Девы явился яко Человек, избави из тления все человечество Своею смертию: чудесы же возсиявый жене самаряныне воды просящей, подает источник исцелений, яко Един Безсмертен.

Песнь 4.

Ирмос: **У**слышах Боже слух Твой, и убояхся, разумех дела Твоя, и ужасохся, Господи: яко Твоего хваления исполнь земля.

Небеса да веселятся, да празднует тварь вся, воста Господь, и явился всем премудрым апостолом Своим.

Пожерта бысть смерти твоя сила, Христу умершу, мертвии яко от чертогов, востанием Сего от гробов изыдоша.

Что рыдаете, о жены? Что с муры ищете Безсмертнаго? Воста, якоже рече, муроносицам глагола ангел.

Самаряныни Господи, просившей подал еси воду, ведение державы Твоея: темже во веки не вжаждет воспевающи Тя.

Троицен: **О** Троице Пресущная, Отче и Слове, и Божественный Душе, Единосильне, Собезначальне! Спаси нас всех верою воспевающих Тя.

Богородичен: Неопалимую купину Тя законоположитель, зряше древле, Даниил же гору святую смотряше, едина Дево Мати Владычице.

И святаго обители, на 4: И Миней на 4.

Катавасия: **На Божественной стражи ...,**

Песнь 5.

Ирмос: **Возсияй ми Господи свет повелений Твоих, яко к Тебе дух мой утренюет, и поет Тя: Ты бо еси Бог наш, и к Тебе прибегаю, Царю мира.**

Гроб Твой святыи достигше уранше муроносицы, блистающася видеша юношу и ужасошася, Твоему научившеся Востанию Христе.

Смерть умертвися, ад пленися, сущии во узах свободишася Христовым Воскресением, возрадуимся и руками восплещим, празднующе светло.

Апостолы възграйте, и ангели ликуйте, земнороднии вси возрадуйтеся: Господь воскрес, тля испровержеся, и печаль преста, и ликовствует Адам.

Источник сый Господи Жизни, воду оставления и разумения даровал еси, жене просившей древле самаряныне. Темже воспеваем неиреченныя щедроты Твоя.

Единицу Триипостасную, Троицу Единосущную, Отца Слова и Духа Святаго, Нераздельна естеством Бога Единого почитаем, Творца и Господа и Владыку всех.

Богородичен: **Т**я дверь непроходимую, и Село невозделанное, и ковчег манну носящий, и ручку и свещник, и кадильницу невестственного угля, именуем Чистая.

И святаго обители, на 4: И Миней на 4.

Катавасия: **Утренюем утреннюю глубоко ...,**

Песнь 6.

Ирмос: **Да не погрузит мене буря водная, ниже пожрет мене глубина: отвержен бо есмь во глубины сердца морского зол моих. Тем зову яко Иона: да възидет от тли зол живот мой к Тебе Боже.**

На кресте Тя беззаконнии пригвоздиша, и копием прободоша Христе, и Иосиф благообразный Тя погребе в новом гробе: из него же со славою воскрес, совоскресил еси Спасе, всю тварь поющую державу Твою.

Верей и врата Владыко, сильно сокрушил еси адовы, и воскресл еси яко Бог, и срет, радуйтесь, рекл еси женам, и сих рещи послал еси учеником: воста Живот, и виден бысть, просвещаяй концы.

Что плачете? Что носите яко смертному жены мұра? Воста Христос, вопияше древле блистайся вельми, явлейся юноша, тѣцы плащаницы оставив: шедше возвестите другом Его Восстание.

Струя сый Господи жизни независтная, и бездна милости Блаже, путешествовав седиши близ кладязя клятвеннаго, и самаряныни вопиял еси: даждь ми воду пити, яко да приимеши оставления воды.

Троицен: Пою Отца Безначальна, и Сына Сопрестольна, и Духа единосущна верно, Едино Существо, и Естество, и славу, и едино Царство Бога всех и Творца, Содержителя всего, со безплотными силами.

Богородичен: Деву Едину рождашую, и утробу нетленную соблюдошу, поем Тя Чистая, Престол Господень, и дверь, и гору, и мысленный свещник, чертог всесветлый Божий, и сень славы яве, ковчег же и ручку и трапезу.

И святаго обители, на 4: И Миней на 4.

Катавасия: Снизшел еси в преисподняя земли ...,

Кондак самаряныни, глас 8-й:

Подобен: Яко начатки:

Верою пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

Икос: Чистая таинства услышим, Иоанну нас учащу, в Самарии бывшая: яко жене беседоваше Господь, воду просив, Иже воды в сонмища их собравый, Иже Отцу и Духу сопрестольный: прииде бо ищый образ Свой, вечно яко Приснославный.

Песнь 7.

Ирмос: Не предаждь нас до конца имене Твоего ради, и не разори завета Твоего, и не отстави милости Твоя от нас, Господи Боже отец наших, препетый во веки.

Со беззаконными Христе щедре волею вменился еси, во время Божественных страсти: и сия сия видяще колебашеся земля, и камене вседетельным мановением распадалеся Непостижимо, и восташа мертвии иже от века.

С душею спеш во страны преисподняя ада, возвел еси мужеством связанныя вся, яже от века смерть прият, горький мучитель, вопиющия Тебе: Иисусе Боже, слава Твоему страшному смотрению.

С мертвыми что вы ищете Живущаго во веки? Воста, якоже рече: се якоже видите празды плащаницы, истощен гроб, явлейся глаголаше мұроносицам юноша: скоро шедше рѣцѣте апостолом.

Вода еси жизни, вопияше Христу самаряныня: напой мя убо Слове жаждущую всегда Твоя Божественная благодати, яко да не ктому, Иисусе Господи, неведения содержа зноем, но проповедую Твоя величия.

Троицен: Отца и Сына, и Божественного воспеваем Духа, нераздельную Троицу естеством сущую, разделенну лица, едино Существо, срасленное, безначальное, Творца всех, и Бога: Егоже вси небеснии поют чинове.

Богородичен: По Рождестве страпнем, Дева чиста сохранилася еси, Святая Богородице: темже ты вси ангельстии лица, и человечестии роди вси, немолчными воспевают гласы, Вместилище Чистое Невместимаго.

И святого обители, на 4: И Минеи на 4.

Катавасия: Отроки от печи избавивый ...,

Песнь 8.

Ирмос: Всяческая Владыко премудростию составил еси, землю же паки утвердил еси, якоже веси, дно, основанием водрузивый на водах безмерных: тем вси вопием воспевающе: благословите дела Господня непрестанно Господа.

Смерть претерпел еси, Едине Безсмертне волею, ада пленил еси, врата медная стерл еси Царю Небесный, и отъял еси узники от века тамо сущия, воспевающия державу Твоюя благодати.

Вознеслся еси Долготерпеливе волею на древо, и камене распадется, и солнце угасе, и завеса церковная раздрася, и земля поколебася, и потрепета всепосмеянный ад, и вся узники рзреша.

Явился еси Господи, во тме сидящим, Свет сый Незаходимый, и Живот всех. Темже Ты яко виде правденых сонм, възграся Слове, и возопи: пришел еси вся от уз разрешити, поющия державу Твою.

Близ сел еси источника, в час Спасе шестый, и самаряныни воду живую подал еси, и разума воды за многое благоутробие. С неюже вси вопием воспевающе: благословите дела Господня непрестанно Господа.

Троицен: Отца Безначальна, Сына Собезначальна поем, и Духа Святого, Бога Единого Трое, неслиянна, непресекома, Содетеля всех, единосильную Державу, самовластную, и вопием: благословите дела Господня, непрестанно Господа.

Богородичен: Углем очищается Исаия, предпроведуя мысленного Угля, воплощаема Дево из Тебе паче мысли, опаляюща человеков вся вещныя грехи, и обожаяща за милосердие естество наше Всенепорочная.

И святого обители, на 4: И Минеи на 4.

Таже: Хвалим, благословим, покланяемся Господев:

Катавасия: Сей нареченный и святыи день ...

Стихословится Честнейшую:

Песнь 9.

Ирмос: Сотвори державу мышцею Своею, низложи бо сильная со престол, и вознесе смиренныя Бог Израилев, в нихже посети нас Восток с высоты, и направил ны еси на путь мира.

Се виден бысть Живот всех Христос, повешен волею на древе: и сия видящи земля потрясется, и многа святых восташа яве телеса усопших, и узохранительница адова поколебася.

Красен из гроба яко Жених от чертога изшел еси, смерти разоривый мучительство Христе, и адовы верей сокрушивый силою Божественною, и Востания Твоего, светом умным просветивый мир.

Поставим вси ныне лики духовныя, и да зовем: Господь воскресе, да радуется земля, да веселится небо, облацы да кропят нам правды тучы, празднующия светло и Христа поющим.

Жизнь живущих, источник благих Господь, богато источаяй воду учений, вопиет жене: подаждь ми воду пити, яко да подам ти воду, грехов твоих источники изсушающую.

Троицен: Свет един нераздельно, Трисолнечная Единица, Безначальный Отец, Сын, и Дух, Божество едино, Жизнь и всех Творец. Того воспоим вернии со безплотными, трисвятыми песньми священнословяще.

Богородичен: Свету бывши жилище, Чистая, озари зеницы души моя, омраченныя многими козньми врага, и видети сподоби ясно от Тебе возсиявший Свет паче мысли, чистым сердцем.

И святаго обители, на 4: И Миней на 4.

Катавасия: Светися, светися

Екзапостилларий самаряныни:

Подобен: Жены:

В Самарию пришел еси Спасе мой Всесильне, и жене беседовав просил еси воды пити, евреем воды источивый из камене несекомаго, юже к вере совосприял еси, и ныне жизни наслаждается на небесех вечно.

Слава и ныне, тойже:

На хвалитех поставим стихи 4. И поем настоящия стихиры воскресны, глас 4-й:

Крест претерпевый и смерть, и воскресый из мертвых Всесильне Господи, славим Твое Воскресение.

Крестом Твоим Христе, от древния клятвы свободил еси нас, и смертию Твоею естество наше мучащаго диавола упразднил еси: востанием же Твоим радости вся исполнил еси. Темже вошем Ти: воскресый из мертвых Господи, слава Тебе.

Твоим Крестом Христе Спасе, настави нас на истину Твою, и избави нас от сетей вражних, воскресый из мертвых, возстави ны падшиися грехом, простер руку Твою Человеколюбче Господи, молитвами святых Твоих.

Отеческих Твоих недр не разлучився, Единородный Слове Божий, пришел еси на землю за человеколюбие, Человек быв непреложен, и Крест и смерть претерпел еси плотию, безстрастный Божеством: воскрес же из мертвых, бессмертие подал еси роду человеческому, яко един Всесилен.

Слава, и ныне, глас 6-й:

Источник живоначала Иисус Спас наш, ко источнику пришед патриарха Иакова, пити прошае воды от жены самаряныни. Сей же неприобщительное иудеом прирекшей, мудрый Зиждитель приводит ю, сладкими глаголы, паче к прощению присносущныя воды, юже и приимши всем проповеда рекущи: приидите, видите сокровенных видца и Бога, пришедшаго плотию, за еже спасти человека.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 4-й:

Подобен: Яко добля:

Источника приснотекущаго сядяща на кладязи видевши жена, терпящи зной премногих страстей исцелительную просяще прияти воду жизни, из Него изливаемую аки поток: юже и прият туне от Слова и не ктому ко кладязю тщится, земному и тленному.

Стих: Наляцы, и успевай, и царствуй, истины ради и кротости, и правды.

Иудейския обычаи жене гонящей, и свое прилагающей непричастное, причастию воды Христос, приобщи мудрый Содетель, сладкими провещаньми, и просити животекущую сию воду Божественную, юже пивши, ко граду прииде возвещающи бывшая.

Стих: Возлюбил еси правду, и возненавидел еси беззаконие.

Ини почерпала имаши, и кладязь глубочайший, откуда убо подаси ми воду нетленную? Самаряныня вопияше Ти Христе, Тебе яко человека мнящи, а не Бога, и словесем чюдящися: юже вещаньми сладчайшими напоив, и Бога Тя всех тварей исповедати сотворил еси.

Слава, и ныне, глас 6-й:

Тако глаголет Господь самаряныни: аще бы еси ведала дар Божий, и Кто есть глаголай тебе, даждь Ми воды пити, ты бы просила у Него, и дал бы ти пити, да не вжаждешия во веки, глаголет Господь.

Таже, Благо есть исповедатися Господеви

Трисвятое. И по Отче наш:

Отпустительный тропарь, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергши, апостолом хвалящися, глаголаху: исповержесе смерть, воскресе Христос Бог, даруяй мірови велию милость.

Слава, и ныне: Богородичен, глас 4-й

Таже ектения: Помилуй нас Боже:

Час 1. И отпуст.

В СУББОТУ 5-Й СЕДМИЦЫ ПО ПАСХЕ

На Литургии

Блаженна от канона самаряныни, Песнь 9-й, на 6:

Се виден бысть Живот всех Христос, повешен волею на древе: и сия видящи земля потрясется, и многа святых восташа яве телеса усопших, и узохранительница адова поколебася.

Красен из гроба яко Жених от чертога изшел еси, смерти разоривый мучительство Христе, и адовы верей сокрушивый силою Божественною, и Востания Твоего, светом умным просветивый мир.

Поставим вси ныне лики духовныя, и да зовем: Господь воскрес, да радуется земля, да веселится небо, облацы да кропят нам правды тучы, празднующия светло и Христа поющим.

Жизнь живущих, источник благих Господь, богато источаяй воду учений, вопиет жене: подаждь ми воду пити, яко да подам ти воду, грехов твоих источники изсушающую.

Слава, Троицен: Свет един нераздельно, Трисолнечная Единица, Безначальный Отец, Сын, и Дух, Божество едино, Жизнь и всех Творец. Того воспоим вернии со безплотными, трисвятыми песньми священнословаще.

И ныне, Богородичен: Свету бывши жилище, Чистая, озари зеницы души моя, омраченныя многими козньми врага, и видети сподоби ясно от Тебе возсиявший Свет паче мысли, чистым сердцем.

По входе, отпустительный тропарь, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергши, апостолом хвалящияся, глаголаху: исповержесе смерть, воскрес Христос Бог, даруяй миру велию милость.

И храма святаго: И тропарь святаго, аще есть. Аще ли будет и другаго святаго тропарь, то рцы его: таже кондак храма. Слава: святаго. Аще ли будет и другаго святаго кондак, такожде рцы его.

И ныне, кондак самаряныни, глас 8-й:

Верою пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

Прокимен, глас 3-й:

Прокимен: Пойте Богу нашему, пойте, * пойте Цареву нашему, пойте.

Стих: Все языцы восплещите руками, воскликните Богу гласом радования.

Апостол Деяний, зачало 37. [Деян. 15, 35–41.]

Во дни оны, Павел и Варнава живяста во Антиохии, учаще и благовествующе слово Господне, и со иными многими. По неких же днех, рече Павел к Варнаве: возвращшися подобает посетити братию нашу во всех градах, в нихже проповедахом слово Господне, како пребывают. Варнава же восхоте пояти с собою Иоанна, нарицаемаго Марка: Павел же глаголаше: отступльшаго от нас от Памфилии, и не шедшаго с нами на дело, в неже положени быхом, не пояти сего с собою. Бысть убо распря, яко отлучитися има от себе, Варнава убо поем Марка, отплы в Кипр: Павел же избрав Силу, изыде предан благодати Божией, от братьев. Проходяше Сирию и Киликию, утверждая церкви.

Аллилуиа, глас 4-й: Наляцы, и успевай, и царствуй истины ради, и кротости, и правды.

Стих: Возлюбил еси правду, и возненавидел еси беззаконие.

Евангелие Иоанна, зачало 38. [Ин. 10, 27–38.]

Рече Господь ко пришедшим к Нему иудеем: овцы Моя гласа Моего слушают: и аз знаю их, и по Мне грядут. И аз живот вечный дам им, и не погибнут во веки, и не восхитит их никтоже от руки Моея. Отец Мой, Иже даде Мне, болий всех есть: и никтоже может восхитити их от руки Отца Моего. Аз и Отец едино есма. Взяша же камение паки иудее, да побьют Его. Отвеща им Иисус: многа добра дела явих вам от Отца Моего, за кое их дело камение мечете на Мя? Отвещаша Ему иудее, глаголюще: о добре деле камение не мечем на Тя, но о хуле, яко Ты человек сый, твориши Себе Бога. Отвеща им Иисус: несть ли писано в законе вашем: аз рех, бози есте? Аще оны рече боги, к нимже слово Божие бысть, и не может разоритися Писание: Егоже Отец святи и посла в мир, вы глаголете, яко хулу глаголеши, зане рех: Сын Божий есмь. Аще не творю дела Отца Моего, не имите Ми веры. Аще ли творю, аще и Мне не веруете, делом Моим веруйте: да разумеете и веруете, яко во Мне Отец и аз в Нем.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвых воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастен: Тело Христово примите, источника безсмертнаго вкушите.